

佛說大灌頂神呪經卷第三

第四同卷

恭二

東晉西域三藏帛尸梨蜜多羅譯

灌頂十二萬神王護比丘尼呪經第三

聞如是一時佛遊於舍衛祇樹給孤獨園與大比丘衆千二百五十人俱爾時有七比丘尼名修陀利在恭二山中塚墓間禪思一心有諸惡鬼神瞰人精氣者嬈是比丘尼脫其衣裳不聽遊行入村乞食是時修陀利比丘尼語同坐諸比丘尼言汝等當正心憶念我師釋迦牟尼多陀阿伽度阿羅訶三藐三佛陀作是言已是諸瞰精氣鬼神退散馳走於是修陀利比丘尼等相將俱到佛所稽首作禮白佛言天尊我等七人受天中天無上眞法思惟一心求四道果是諸瞰精氣鬼神七萬餘頭來亂我等不得正念亦復遮圍不令行求

飲食之具見惱如是當奈之何唯願天尊說於聖術而辟除之說是語時阿難在右邊佛顧語阿難言汝見是修陀利比丘尼七人等不阿難答曰見佛言阿難是諸比丘尼常爲七萬鬼神所嬈我今當爲其召須彌頂上及海中諸大神王當護是等諸比丘尼不令諸小魔神得其便也佛於是便以神力召須彌頂上諸鬼神王來已是諸鬼神王將從七萬鬼神來到佛所稽首禮足佛告諸鬼神王等我若在世及滅度後在所國土城邑聚落護諸比丘尼不令諸小鬼神之所得便令諸比丘尼所到之處常隨護助使得安隱諸惡之鬼不得嬈近佛復告勅大海居止水精山中龍宮所住之處有五萬鬼神將其營從來到佛所各禮佛足却住一面佛又告須彌頂上

七萬神王及海中五萬神王等汝從今以後
 當護諸比丘尼令得安隱離諸恐怖得定意
 得定行令諸小魔退散馳走遠於是處百千
 由旬不得作害佛說是已賢者阿難長跪又
 手前白佛言是等神王其字云何願為解說
 佛言阿難其神名字我今說之灌頂章句其
 名如是

神名枝活吒質蚤字淨自在此神主護某頭
 神名倪提愁愁蚤字妙善生此神主護某眼
 神名波羅愁愁蚤字暉日光此神主護某鼻
 神名和沙頭提手字信堅固此神主護某耳
 神名頭荷尼迦移字開疑惑此神主護某口
 神名臚迦黎迦移字光普攝此神主護某頸
 神名沙提舍鳩羅字善安吉此神主護某肩
 神名波羅闍迦提字耀雪山此神主護某臂

神名波羅頭阿鉢字演光明此神主護某手
 神名迦摩隸吒遮字香珍寶此神主護某胃
 神名俱波婁閱又字如福輪此神主護某背
 神名沙善般遮攬字清微徹此神主護某腹
 神名旃遮軟摩伏字音和柔此神主護某脇
 神名遮捷陀黎子字福德光此神主護某心
 神名遮羅乾波頭字真寶種此神主護某肝
 神名波羅斯奴遮字遠聞聲此神主護某肺
 神名蘇質迦闍羅字建行至此神主護某脾
 神名劔浮耆黎愁字慈悲普此神主護某腎
 神名迦俱攬締^{恭二}迦字越衆行此神主護某腸
 神名恒多羅菩提字威解振此神主護某胃
 神名摩多羅和提字真如天此神主護某臍
 神名至那比舍尸字愛事業此神主護某脛
 神名曼比舍尸羅字除恐畏此神主護某膝

神名迦羅鋪阿尼字願施廣此神主護某脚
神名阿沙耶迷和字消諸惡此神主護某出
神名抄伊摩陀伊字護世主此神主護某入
神名阿提摩陀伊字加諸願此神主護某坐
神名阿奴摩陀伊字星中王此神主護某卧
神名破仇摩陀伊字首安寂此神主護某夢
神名蘭脾留波利字行寂然此神主護某起
神名耶頭破那坻字德明遠此神主護某食
神名比尼槃頭倚字蓋天地此神主護某飲
神名波斯離次離字真不邪此神主護某語
神名具黎乾陀離字施願普此神主護某笑
神名跪離那波羅字快善意此神主護某戲
神名末黎游沙黎字顯高明此神主護某樂
佛語阿難是須彌頂上三十六神王名字如
是有七萬鬼神以為眷屬當作擁護令修陀

利比丘尼及未來末世中諸比丘尼等若為
邪神所惱亂者不令得便所到安寧不為邪
惡所中設有燒者心當存呼灌頂章句三十
六神王應念即至尊從左右為諸比丘尼現
威神力攘諸魑魔使不得便辟除凶惡消滅
不善令得吉祥佛復告賢者阿難大海之中
龍宮居止有三七大神王之女我昔得道與
其眷屬來到我所稽首作禮說如是言當於
佛滅度後五濁末世之中護佛弟子我已面
勅此諸神王今當擁護修陀利及未來末世
諸比丘尼等此諸神王亦不違本誓若有危
厄禍害之日當當淨心歸命三寶然後呼其
名字無不為護輒在左右阿難白佛言是諸
神王有如是利益唯願速說灌頂章句善神
名字為守護故使諸比丘尼離諸恐懼不為

邪妖之所惱近佛言阿難是大神王女名字如是

神王女藍波惟藍波字珠瓔珞

此神女為某辟除邪惡魍魎鬼驅逐百千由旬不令得住

神王女鴛那多烏那陀字摩尼寶

此神女除去鳥鳴野狐變怪因衰燒人者不令住某舍宅之中

神王女蘇買迦羅闍字好莊嚴

此神女主夢寐顛倒見諸先亡傷毀之鬼悉能消伏

神王女摩奴羅摩遮字嚴飾妙

此神女若遊出時異道聚會飲食有毒自然消化

神王女劔浮耆梨惹字寶連珠

卷二

五

此神女護諸怨家若相見時起諸毒惡即便和解相向

神王女惟舍羅遮迦字瑠璃光

此神女若有嫉妬惡心相向者以帶持故不生貪心

神王女攄樓迦攄樓字身徹照

此神女若有債主求諸財寶以神護故便寬除消息

神王女迦羅博多尼字華開敷

此神女某若為盜賊惡伴所引至縣官時即便解脫

神王女滙迦陀羅遮字香烟氣

此神女主治蜚尸客氣之鬼復連鬼神即便磨滅不現

神王女稜迦移羅那字妙王頂

此神女若為龍象所害種種恐畏以其誦持自然消滅

神王女劔蒲闍浮無耶字遊戲樂

此神女護其種種疱腫衆衰頭痛寒熱即便不行燒害

神王女迦俱攬締迦字淨如梵

此神女護其不為山神樹神惡死善死鬼神所燒害也

神王女遮羅締迦那字音深妙

此神女護其至大小便利之時不為惡鬼神所觸燒也

神王女曼羅鳩黎陀字信善語

此神女護其屋舍牀席帳幔不使他餘鬼神留停宅中

神王女醫頭黎迦羅字師子音

卷二

六

此神女守護其門戶宅舍四方八神之王勅令鎮護除去不祥

神王女訶栗提羅伽字樂音樂

此神女典領八十億神諸神之母護其使萬病除愈百事吉祥

神王女薩遮摩陀利字聲清徹

此神女護其不令他人厭禱憎嫉之者使厭禱不行害也

神王女曼多羅阿佉尼字欣樂快

此神女主五瘟疫毒若頭痛寒熱其若呼名即為作護也

神王女鳩蘭鞞吒羅字結明誓

此神女主諸毒蛇虻蝮若嚙人者存呼七遍毒即不行

神王女抄多摩尼摸字柔輒音

此神女護某不令盜賊剝奪衣裳呼其名字賊即退走

神王女沙臈波提敷字心安詳

此神女護某牙齒若為蟲所嚙者存乎其名七遍蟲即消滅

佛告阿難我所說海中灌頂章句神王女其

名字如是此諸神王女與其眷屬五萬鬼神

遶海邊行一日一夜周匝八萬四千由旬以

血肉為食今皆得道為末世比丘尼輩現威

神力作大護助辟除邪惡萬毒不行佛語修

陀利及未來諸比丘尼等若有能持是灌頂

章句則離一切無數恐懼若持此神呪夢安

覺歡不畏縣官水火盜賊怨家債主自然辟

去鬼神羅刹妖魅魍魎邪惡薛荔厭鎮之鬼

樹木精神百蟲精神畜生精魅溪谷精魅門

中內外鬼神戶中內外鬼神舍宅四方井竈鬼神洿池鬼神廁溷鬼神若比丘尼帶持經者此諸惡鬼終不得便若有厭禱呪詛之者其人帶持神呪經故自然辟惡兩作和解俱生慈心惡意悉滅無復惱害諸比丘尼若在山中溪谷曠路抄賊劫略自然不現師子虎狼熊羆蛇虺悉自縮頭藏不害人也何以故此十二萬神王大神呪經至尊至重能為諸比丘尼作大利安佛語修陀利及未來世諸比丘尼等說此灌頂無上章句若後九百歲中為諸邪惡魅鬼媿人因衰作害或有惡魔吐種種雜毒之氣以害汝等復有鬼神吸汝五脈又有鬼神瞰汝精髓如是惡鬼瞰人肉者不可稱數我今為汝略說少耳佛告阿難若後末世諸比丘尼為惡鬼神所媿惱者當

洗浴身體著鮮潔之衣當專心一意讚詠此經當以五色之綵作好幡蓋香汁泥地縱廣七尺然十方燈散雜色華燒衆名香膠香婆香安息香等禮拜十方七日七夜長齋菜食不噉五辛審諦莫疑是諸惡魔聞見此經神呪力故即馳散而去遠百千由旬不能爲害消滅不善吉祥感應於是以後修陀利及未來諸比丘尼等悉共讀誦書持是典而供養之中有閻鈍比丘尼輩不能讀誦者但書持是典以好繒綵作囊盛之若欲行來出入之時輒著衣前所往來處獲善吉安若有惡魔自然滅亡無敢當者此大神典至尊至妙極有威神若後末世書持此典佩帶在身遊行十方無所復畏以是因緣出此神呪令人讀誦受持供養所帶佩之佛說是語時天帝釋

如人屈伸臂頃從天來下往到佛所稽首作禮長跪叉手白佛言天尊然諸佛至真德過須彌智超江海慧踰虛空獨步三界無能及者十方一切莫不蒙度天帝釋說此讚歎時虛空中雨天香華以散佛上諸天歡喜鬼神亦然佛說經竟阿難從座而起長跪叉手白佛言演說此經當何名之佛語阿難及諸四輩我說此經名十二萬鬼神之王灌頂章句汝善持之於吾滅後若有清淨諸比丘尼歸命求者應當授與佛說是經已阿難叉手白佛言設有諸比丘尼若欲受者云何授與佛言當如大比丘受七萬二千神王灌頂大法無有異也佛說是已四輩弟子天龍八部莫不歡喜作禮奉行

佛說大灌頂神呪經卷第三